

欽定剿平三省邪匪方略

欽定剿平三省邪匪方略正編卷二十五

丁巳年

二年正月初二日

癸卯

惠齡慶成奏言查賊匪現

分兩起一向東南逃竄業經恒瑞等帶兵前往

截剿一向東北逃竄永保等帶兵兜擊

臣

惠齡

接辦後據各兵弁探報此起夥黨又分三股現

在梓山王家城紅土岡等處民村分擾約共七

八千人等語

臣

查王家城離紅土岡約六七里

距梓山二十餘里賊人三處分拒意欲牽制官
兵必須出其不意分路進攻可期制勝隨派副

將丁有成帶領官兵截住梓山賊人來路叅將

穆克登布帶兵徑過紅土岡截殺賊匪

臣

惠齡

率領副將百祥等帶兵由北面進攻王家城

臣

慶成會同總兵德光督率副將觀祥等帶領綠

營官兵由東路進攻巴克坦布訥音督率翼長

舒通阿等帶領馬兵由西路進攻並令副都統
六十七巴圖魯侍衛哲克等分帶馬兵伏於東
南一帶策應又派候補道府恒慶巴拜率領鄉
勇在王家城西北山橋堵截於十二月二十四
日寅刻同時並發直抵王家城壘該處前後皆
有山河陡坎深險東南一帶高岡約長四五里
賊匪分拒河沿山岡密如蟻聚並將前後河岸

培高數尺距河抗守惟時天尙未明賊人已
知覺密於河坎伏候我兵渡河臣等隨督將領

兵丁繞河用礮轟擊殺死數十人賊匪少退隨

卽帶兵搶過彼岸賊見官兵三路渡河進攻亦

分三路前來抗拒官兵直前撲殺鎗箭齊發賊

匪各用門板遮護臣等當令巴圖魯侍衛等帶

領馬兵衝入賊隊賊匪立脚不住四散奔逃我

兵乘勢上前刀砍矛戳殺死賊匪多人時臣慶

成德光巴克坦布訥音等已從東西兩路掩殺

前來三面圍剿伏屍遍地賊匪狂奔復行佔踞

山岡從上施放鎗礮臣慶成同六十七帶領巴

圖魯侍衛及奮勇馬兵由岡西抄上副將觀祥

都司岳寧阿帶領馬兵由岡東抄上殺死數十

人賊匪盡向紅土岡賊寨飛逃臣思王家城雖

已奪獲餘匪尙多且紅土岡屯聚賊匪見夥黨
敗逃自必驚惶莫措亟應趁此奮力攻擊隨激
勵官兵鼓勇直前將至紅土岡賊匪已豫爲准
備排列山梁我兵向上迎撲賊匪居高下壓稍
得地勢時有直隸督標把總董紹昌首先射死
執旗賊目一名帶領兵丁索明才等六人奮勇
搶上大兵隨一湧直進賊匪見賊目被執執轉身

亂竄我兵馬步齊上橫衝直擊登時殺賊無數
賊人向山岡南首紛逃穆克登布帶兵自後窮
追甫至山嘴忽伏匪千餘人突出並有敗逃匪
黨合衆助勢將穆克登布圍裹該將率領弁兵
奮力衝擊適副都統訥音帶領策應馬兵自後
而來德光丁有成亦均趕到官兵見有外援勇
氣倍增穆克登布督兵衝殺內外夾擊殲斃多

賊當卽破圍而出餘匪潰亂又追殺十餘里惟把總董紹昌衝入賊隊中鎗陣亡時已天晚該處地勢平曠賊匪四散奔逃不便零星追襲致勞兵力當卽紮營暫住計此次拏獲活賊李天澆等二十一各割獲首級九十八顆奪獲馬騾牛驢二百餘匹分賞出力官兵糧食分賞鄉勇鎗礮刀矛留營備用隨提李天澆等逐一訊問

據稱兩路賊匪尙有一萬數千人姚之富等現
已奔逃鍾宜一帶此起北竄賊目係劉起榮張
富國二人因官兵截殺未能前去現又逃往何
處實在不知等語當將各犯概行梟示查看賊
蹤似欲折回向南歸併一處臣等一面飛札恒
瑞等相機截殺一面帶領官兵分投剿捕期將
首逆速行擒獲奏入

上命軍機大臣傳諭惠齡曰惠齡等帶領將弁官兵
截剿東北一路賊匪渡河追殺將王家城紅土岡
賊壘攻克雖據稱被殲賊衆伏屍遍地但割獲首
級僅九十餘顆且據稱賊匪尚有萬餘而所殺之
賊不及百分之一所辦未足慰懷現在東北一路
祇餘梓山一處而姚之富等訊據獲犯供稱已奔
逃鍾宜一帶此旨到時若惠齡已將梓山賊匪剿

淨並生擒劉起榮張富國則姚之富之羽翼既去
其勢益孤凶屬甚善倘梓山賊匪尙需搜捕惠齡
竟當統領官兵速赴東南一路與恒瑞等會合速
將逃竄鍾宜賊匪四路截殺設法擒獲姚之富爲
要其竄匿梓山賊匪祇須派令領兵大員一人酌
留一二千兵在彼攻剿劉起榮張富國究不過姚
之富黨與若能將姚之富擒獲則該二犯失所倚

恃更易成擒惠齡當以永保爲前車之鑒奮勉截
殺務擒賊首不可專事尾追致賊南北奔竄分我
兵勢耽延時日所有此次帶兵各員除慶成前次
隨同貽誤俟事竣核其功過再行降旨外訥音德
光六十七丁有成觀祥穆克登布岳寧阿著惠齡
存記如果始終出力卽咨部議敘兵丁索明才等
並著惠齡查明若再奮勇殺賊酌量以外委振補

把總董紹昌衝入賊隊中鎗陣亡殊爲可惜著咨
部照千總例議卹至東南一路竄匪旣經恒瑞帶
兵往剿何未據奏及得勝情形恒瑞等旣隨同玩
悞於前若再不上緊剿辦使姚之富又復他逸試
思當得何罪勉之慎之

初四日乙巳宜綿秦承恩柯藩奏言查汝河賊匪

因聞安嶺將軍山大小米溪等處俱已蕩平心

懷畏懼盡數併入洞河五作雲賊巢合力抗拒
該處舊名板廠寨居萬山之中五峯環列各高
十餘里中有小山包一個四面陡崖從前順治
年間曾有巨寇負固多年始行殄滅賊匪於此
地壘砌石城一道其內又圈一木城並於出入
要路各設石卡豎立木柵分衆拒守自數百人
至千餘人不等布置極爲嚴密寨之前面爲洞

河右爲大道河左爲汝河其後爲斑鳩關雷打

石

臣

宜綿山洞河進兵迎擊賊人前面

臣

柯藩

索費英阿由大道河汝河分路進兵遶截賊人

後路又賊寨東北有花梨岡小路一條可以抄

出大道河之後柯藩一人難以兼顧臣宜綿隨

知會臣秦承恩帶領兵丁及湖北竹谿縣投効

鄉勇由花梨岡進擊其運送軍火糧餉交漢興

道文需經理臣等布置已定因初七八日以後

雨雪連綿難以進兵至十五日雪勢愈大料賊

匪防守必懈莫若乘其不備一鼓前進隨密行

知會各路定於十六日一齊進兵索費英阿在

牛頭寨察看五作雲賊寨後連設五卡必須奪

佔各卡居高臨下攻撲始易卽於是日寅刻帶

同叅將李文蔚等各帶兵勇潛攻賊人頭卡賊

人果未設備鄉勇向明山首先越進卡內我兵
一擁齊上刀砍矛刺賊人跑避不及盡被殺斃
索費英阿卽乘勝催兵將第二第三兩卡登時
攻克進至第四卡賊人於卡內施放鎗礮備禦
甚嚴我兵不能撲上隨將官兵撤回第三卡內
趕運大礮轟擊一日始將第四卡五卡攻破殺
斃賊匪八九百人卽佔踞五作雲之上

臣柯藩

由迴水灣進至斑鳩關攻破賊卡卽派都司關
聖保帶兵三百名在關住守以防賊人竄逸入
川之路一面督率遊擊海洪阿等帶領兵勇進
攻萊麻坪賊卡賊人乘高安礮迎擊我兵不能
向前有把總馬存外委傅祿兵丁袁芝竹溪鄉
勇吳繡才鍾萬周柯以得等伏地蛇行而進撲
上賊卡奪礮吳繡才被礮轟斃鍾萬周被矛扎

死馬存等趁勢撲上搶獲賊礮推滾下山與賊衆拚命格鬪其時海洪阿等各帶健兵手執短刀跳進賊卡縱橫砍殺滿山追逐殺死一千餘

人

臣

秦承恩督率署副將圖興阿等帶領兵勇

進至花梨岡賊衆約六百餘人據卡固守鎗礮齊發我兵連撲三次未能卽上銳氣倍增適賊礮炸裂自行轟斃多人並將卡內火藥烘燃烟

焰冲起圖興阿等督率兵勇乘勢撲進將賊卡
奪獲卡內賊匪盡數殲斃

臣

宜綿帶兵自洞河

口起行懸崖小徑僅能魚貫而入抵小壩子賊
卡賊人正在炊飯我兵吶喊齊上賊望風奔潰
我兵隨後追捕殺斃甚多傍晚趕抵因連橋見
賊衆七八百人於橋岸排列烏鎗刀矛勢甚扼
要難以乘夜進攻暫行劄住傳問土人知下游

十里外水淺處渡河翻過兩道山梁卽係賊人

後路臣宜綿隨密派叅將雷仁等帶兵於二更

後潛行渡河抄出賊後以鎗聲兩響爲號因道

路紆迴至次早始聞鎗聲卽督飭兵勇奮力搶

橋賊人只顧向前抵敵不料後有官兵忽從山

梁壓下勢甚慌亂我兵前後夾擊殺死賊匪五

百餘人餘匪皆滾崖落河身死十八日黎明各

路官兵會齊俱進逼五作雲大寨賊人悉衆入
城抵死抗拒我兵奮勇撲上俱被賊人鎗礮擊
退隨挑選勇敢弁兵各執檣牌千觔直撲城下挖
掘城根賊人插石如雨我兵立脚不住間有損
傷都司白印斗守備楊虎千總馬龍候補千總
張宗詒等各運大礮轟擊奈城壘甚堅自辰至
午摧缺數處賊匪拚死向前隨缺隨補有千總

馬自易跳上石城砍斃多人被賊匪層層裹住
扎傷身死外委魏朝奉馬殿元兵丁蔡連王庫
等撲上救護亦被賊入戕斃時各路官兵人人
奮怒連撲數次皆未得手天色已晚臣宜綿暫
令撤退次日分遣四路官兵更番連撲使賊人
應接不暇以疲其力一面遣人登高瞭望見城
內草屋甚多可用火攻但相距尙遠不能拋擲

火彈隨趕緊製造火箭數百枝令索費英阿於十九日五鼓後帶領奮勇兵弁由石崖攀援而上潛至賊人寨後二十日黎明時臣宜綿秦承

恩柯藩督兵從前面進攻索費英阿卽從後面將火箭放入登時火起草房板屋全行燒著延及木城煙焰騰起賊匪十分慌亂臣等卽督催

大兵一齊湧上刀砍矛扎斃死賊匪三千餘人

被焚及自戕男婦又一千餘人奪獲礮位鳥鎗
刀矛兵械不計其數生擒賊犯廖景華等二百
餘名訊據供稱賊首係胡知和廖明萬季九萬
王自儉四人廖明萬季九萬俱於寨內被官兵
殺死胡知和王自儉二犯因官兵攻打緊急滾
坡下山未知下落並據稱王自儉係從四川潛
來陝境勾結胡知和廖明萬等起事等情隨據

斑鳩關兵勇稟報於卡所捕殺一人餘匪供係
賊首胡知和割取首級呈驗當向賊寨內查出
廖明萬季九萬屍身交與洞河鄉約及全家被
害之張廷珍等識認屬實隨即剉屍示衆並將
現獲廖景華等各犯一同正法其官兵甫到之
時賊匪畏懼逃避各卡兵勇殺斃者又二百餘
人所有紫陽境內賊匪業已淨盡無遺惟查五

作雲一帶山高箐密多有通川小路現在王自
儉一犯既無下落此外保無翻山越嶺潛竄入
川之事隨派索費英阿帶赴川之兵出斑鳩關
由六道河沿途搜捕先至太平臣宜綿亦帶兵
由毛壩關出境與索費英阿會合先將太平縣
東南一帶賊匪剷除再與觀成英善等會剿東
鄉達州賊匪務期淨盡至興安府屬未盡賊匪

惟安康縣之光頭山一處臣秦承恩柯藩卽會
同剿辦至此次在事出力文武員弁尤爲出力
者謹繕名單恭呈

御覽其陣亡受傷弁兵咨部照例賞卹再臣等帶兵
行抵興安卽有率領鄉勇之職員生監呈請投
効者十數起各帶鄉兵隨營聽調前於剿除安
嶺將軍山賊匪時業將打仗出力之捐職州同縣

丞暨武生等

奏請錄用荷蒙

聖慈允准嗣後攻克青山溝堽駝家壩松樹壩越梅

溝大小米溪蒿坪河各賊寨該鄉勇益爲奮勉

出力臣秦承恩復接據湖北竹谿縣知縣宗超

海來稟轉據該縣士民呈稱聞興安匪徒滋事

情願自行團練鄉勇一千三百名到省投効等

情經臣等派令隨同各營兵丁打仗甚屬勇往

出力當將各鄉勇隨時賞恤外臣等查帶領各

鄉勇之職員生監等念切同仇頗知大義或自

出貲財召募或捐備資斧隨同照料此次派隨

官兵攻打五作雲賊寨時值隆冬山深雪大奔

走維難俱屬不辭勞瘁又能約束衆人安靜守

法實屬勤能有用相應仰懇

皇上隆恩分別敘用賞銜以爲倡義急公者勸查得
率領竹谿鄉勇捐職州同周岐柏九品職銜宗
登輓率領平利鄉勇從九品職銜涂建邦監生
童燦率領安康鄉勇捐職縣丞宓杰生員劉儀
劉信率領漢陰鄉勇生員張彩率領洞河鄉勇
生員李傳簪張應邦張應選共十一人此內周
岐柏涂建邦宓杰劉儀張彩李傳簪張應邦等

七名尤爲奮勉出力周岐柏涂建邦宓杰請以
本銜選用劉儀張彩李傳簪張應邦請以訓導
選用其餘出力之宗登輒請加給正八品職銜
童燦請給從九品職銜劉信張應選請給訓導
職銜再率領白河鄉勇新選福建巡檢張聚珍
現在隨營屢次打仗甚爲得力經臣等將其勞
績請給陞銜據稱不敢妄邀陞擢惟伊母年老

懇求照例改選近省以便迎養等語可否俯如
所請

勅部另選之處出自

聖恩又臣宜綿秦承恩前赴鄖陽剿賊帶有書吏朱

廷珪楊起鳳強漪郭際會強配德王萬英陶雲

鶴程慶麟等八名隨營辦事甚屬奮勉內宋廷

珪楊起鳳二名曾於鹽茶軍需案內辦事出力

經前督

臣

福康安奏明賞給未入流職銜在案

茲隨安康紫陽軍營凡調派官兵撥運軍火一切繕辦安速跟隨文武員弁晝夜辦公不辭勞瘁宋廷珪楊起鳳年力壯盛心地明白強漪郭際會強配德王萬英陶雲鶴程慶麟等六名隨營數月奔馳辦事亦有微勞謹一併據實奏

聞

同日明興奏言臣於十二月十一日由洞河軍

營帶兵馳赴鄖陽二十四日行抵商南探得楚

匪已向東南逃竄雖去陝境漸遠猶恐有逸匪

竄入卽將商屬各隘口遍歷稽查經鳳州道王

文湧督率員弁分派兵役鄉勇堵截頗爲嚴密

現有副都統豐伸布帶領滿兵五百名駐劄防

範茲聞宜綿現赴達州會剿川匪臣思商屬地

方俱極平寧卽於二十八日帶固原兵五百名
由商南前往達州協同進剿均奏入

上命軍機大臣傳諭宜綿恒瑞慶成日洞汝二河賊
匪併人五作雲賊巢負嵎死守經宜綿秦承恩柯
藩索費英阿帶領將弁兵勇乘大雪時分路進剿
攻克賊巢痛殲賊匪數千餘人並將賊首胡知和
廖明萬季九萬殺斃紫陽境內賊匪淨盡無遺所

辦實屬可嘉除另降諭旨分別加恩外宜綿秦承
恩柯藩絜費英阿著各加賞金盒一個綠玉搬指
一個大小荷包其帶領兵勇出力之遊擊圖興阿
著卽以叅將陞用都司薛大烈白印斗守備楊虎
千總馬龍張宗詒把總馬存外委傅祿著各以應
陞之缺陞用兵丁袁芝鄉勇向明山俱著拔補千
總馬自易首先跳入石城中矛身死實爲可惜著

咨部照守備例議卹其撲止救護被賊戕斃之外
委魏朝奉馬殿元照千總例議卹兵丁蔡連王庫
照外委例議卹至花梨岡賊衆據卡固守我兵連
撲三次未能卽上適賊匪所用之礮炸裂自行轟
斃此皆仰賴

上天嘉佑助我成功叩謝之餘實深欽感現在祇有安
康縣光頭山一處賊匪經秦承恩柯藩前往剿辦

此等潰散餘匪爲數無幾諒已悉就殲除陝境卽
可寧謐據稱索費英阿卽帶赴川之兵先至太平
宜綿亦卽帶兵踵至宜綿等屢次克捷事機順利
今趁此軍威乘勝直前會合英善等分投剿捕東
鄉太平賊匪自無難一鼓殲除再宜綿年近七旬
該處兵力無多自剿辦興安賊匪以來所向克捷
而永保恒瑞慶成等年富力強又屢添派勁兵助

剿乃竟毫無籌畫專事尾追任賊奔竄其節次打仗情形間曾有一次能如宜綿等之四面兜擒捕殲賊衆者乎著將宜綿等摺抄寄閱看使知愧勵上諭內閣曰宜綿等奏洞汝二河賊匪恃衆抗拒經宜綿等分路攻剿冒雪前進殺賊多名將首夥各犯悉數殲擒並無漏網辦理實屬可嘉宜綿秦承恩柯藩索費英阿除另加獎賞外俱著交部議敘

索費英阿於賊寨西南進兵連奪五卡官兵得以
乘勢下壓尤爲出力著賞給提督銜以示獎勵又
另單所奏出力八員遊擊圖興阿李昌漢興道文
需知府龔景瀚俱著賞戴花翎知州趙洵莊炳前
已賞戴藍翎亦著賞換花翎千總蔣福陶得福鄔
海慶尙其倫筆帖式宜寧俱著賞戴藍翎叅將富
仁著賞戴花翎守備吳璉知縣龍萬育嵇承裕俱

著賞戴藍翎並以應陞之缺陞用其率領鄉勇尤
爲出力之捐職州同周岐柏等均著照所請分別
加恩書吏宋廷珪楊起鳳均著照吏員之例以八
品補用其強漪等六名著賞給從九品未入流職
銜再向來鄉勇人等久無職銜其因打仗陣亡者
尙不得與兵丁等一體遞卹殊不足以勵其忠義
之心卽如此次官兵進剿洞汝二河賊匪時鄉勇

吳繡才鍾萬周與弁兵等首先奪卡中矛被礮身
死此等能知大義殺賊捐軀之人實堪憐憫自應
格外施恩嗣後除尋常堵禦助勢被害之鄉勇仍
照舊例辦理外其奮勇出衆臨陣被戕如吳繡才
鍾萬周者均著照外委例議卹以示優獎而昭激
勸

初六日丁未惠齡慶成奏言臣等自剿殺王家城

紅土岡賊匪後卽遣人前至梓山察看賊匪情形旋據回報梓山之賊已向東北一帶放火前

來

臣

思賊匪明知大兵從東北一路進攻豈敢

轉向迎撲且姚之富等現在竄往西南斷無不思與彼會合之理是其在東北一帶放火不過欲牽制官兵遂其遠竄之計當將官兵分爲兩路

臣

惠齡與巴克坦布德光等帶領繞往東南

迎擊臣慶成與訥音六十七等帶領滿漢官兵

由西北抄襲二十七日黎明同時並發臣惠齡

行抵官潭地方正遇賊匪竄至該處欲行焚搶

居民絡繹奔逃當卽好爲安撫止令毋庸遠去

一面令副將觀祥等帶領馬步兵一千名繞至

官潭之前臣惠齡帶兵直前迎擊賊匪不意官

兵猝至驚慌失措當卽奔出村口齊上山梁隨

鼓勵各兵併力撲上而觀祥等亦各帶兵趕到

兩面夾攻臣慶成見官潭地方火起星馳踵至

一齊分路進剿賊匪公然抗拒官兵衝入賊隊

攪殺一處觀祥連射二賊時有手執白旗騎馬

賊目一名指揮衆賊圍裏前來把總張進忠持

矛與賊格鬪右脇中傷卒將賊目殺死訥音六

十七等帶領馬兵往來衝突殺賊衆多賊匪不

能抵禦拚命向東南奪路而逃臣等督催兵將

隨後追殺殲戮多賊割獲首級一百二十三顆

生擒賊匪李桐阮學文等二十五名奪獲糧食

牛驢無算仍令賞出力官兵外當提李桐等逐

一訊問據稱戮死騎馬賊目各阮進明與劉起

榮等分管賊衆昨劉起榮自王家城紅土岡敗

回想欲逃往東南與姚之富等合併因恐官兵

追剿故向東北一帶放火希圖官兵從彼殺去
卽可遠竄不料又被剿殺等語餘無要供當將

李桐等正法梟示_臣等卽於次日統兵前進並

探聞賊匪現逃在容合店山岡屯踞當上對面

山梁察看賊隊分爲六處從西北至東南約有

六七千人豎立多旗支搭棚帳山岡之下率皆

水田高坎蜿蜒小路田內水積泥淤我兵頗艱

馳突惟西北平岡一道離賊隊約二二三里若於
此路進攻似易得手隨將我兵分爲八隊馬步
相間鎗矛連接並派侍衛哲克都司岳寧阿先
帶馬兵繞至平岡又派侍衛江鼎祥金保參將
馬斌帶領馬兵從正西一路衝其中隊餘兵遙
相牽制使賊難於併力時己未初臣惠齡等帶
兵由平岡一湧直上賊匪齊來抗拒我兵隨放

進步連環鎗礮如雨賊始轉身敗走經

臣

慶成

帶領官兵從山溝暗上向前攻擊千總劉鎧殺
斃執旗一賊外委楊存福衝入賊隊墜馬跌傷
賊人上前欲拏該弁奮身躍起生擒一賊上馬
馳回賊眾見官兵驍勇異常悉行潰亂我兵趁
勢追剿又殺斃數十名其東南山岡賊匪兩隊
仍然搖旗助勢當派委前鋒叅領鍾福帶領健

銳火器兩營馬兵從東南山岡壓下德光等帶
領步兵由對面山凹直前撲上賊衆紛紛逃竄
我兵追至相離二十里之五桂井地方賊匪棄
寨前逃沿途拋棄帳房糧食衣物牲畜累疊不
絕時已二更道路叢雜兵將等轉戰一日未便
枵腹卽於山岡上將營紮住並探聞恒瑞等已
由雙河彭家岡帶兵截剿兩路賊匪勢欲歸併

一處必須分路夾擊臣等已遣弁繞道前往與

恒瑞等密訂日期前後夾攻總期迅擒首逆再

百祥現已補授重慶鎮總兵該鎮歷練戎行打

仗勇往留於軍營固屬得力惟念達州地方正

需鎮將帶兵臣卽令百祥由驛馳赴達州其原

領官兵已交總兵德光一併管領足資約束

同日恒瑞舒亮奏言臣等前在棗陽縣屬梁家

集一帶剿賊因探得賊首姚之富等業經分股
向南逃竄是以臣恒瑞碩雲保富成於十二月
十九日卽帶兵與王永保等分路剿辦臣舒亮阿

爾薩朗亦由張家集前來會台臣等卽帶領巴

圖魯侍衛並各營馬兵由李家樓宋家集等處

繞赴賊前擱頭截殺阿爾薩朗富成帶兵隨後繼

進詎賊匪狡異常遙見前有官兵復折向正

東奔竄

臣

等恐其竄入京山卽帶兵繞至雙河

一路截剿殲斃賊人一百餘名賊匪自知不能

遠遁連夜折向東北而北路之賊已被惠齡等

剿敗向南逃竄是以兩路賊匪仍復歸併在五

桂井一帶屯聚

臣

等於二十八日巳刻帶兵趕

至彭家岡賊匪倚恃聚衆分爲三股佔踞山梁

排列陣勢

臣

等亦分兵三路富成督率副將穆

維等帶領山東弁兵由左邊前進

臣

舒亮阿爾

薩朗督同翼長七十五等帶領健銳營滿兵由

右邊前進

臣

恒瑞督率協領拉明阿等帶領西

安滿漢官兵由中路前進副都統碩雲保帶領

巴圖魯侍衛丑保伊里布等並各營馬兵相機

衝殺又派令知府張璿効力原任知州應先烈

各帶鄉勇五百名在後遙爲聲勢一齊並進賊

人負嶠抗拒施放鎗礮擲石吶喊經碩雲保等
從旁超上山梁富成卽乘勢帶兵鼓勇直上施
放連環立斃賊匪多名左邊之賊先行敗退

臣

恒瑞舒亮阿爾薩朗亦俱帶兵併力仰攻三股
賊匪全行潰竄我兵乘勢下壓追殺五六里因
天色已晚且山林重疊未使窮追卽在彭家岡
割營約計殲斃賊匪二百餘名鎗死執旗賊目

繆玉林等二名生擒活賊十九名訊無要供當
卽正法弁兵間有傷亡容俟查明咨部均奏入
上命軍機大臣傳諭惠齡恒瑞曰梓山賊匪向東北
一帶放火爲牽掣官兵之計經惠齡窺破賊人狡
獪帶領將弁繞往東南迎擊慶成出西北抄襲賊
匪果向東南竄逸官兵兩面夾剿痛殲賊衆餘匪
俱逃至容合山岡藏匿復經官兵乘勝進攻追殺

二十餘里所辦可嘉之至又據恒瑞等奏探得姚之富等分股向南逃逸卽帶兵繞出賊前攔頭截殺賊匪向東北竄逃隨帶兵趕至彭家岡分路剿殺殲斃賊匪三百餘名生擒活賊十九名辦理亦好外委楊存福衝入賊隊墜馬跌傷復奮身躍起生擒一賊實屬奮勇如果始終出力著卽以守備超擢千總劉鎧把總張進忠俱殺斃賊目著以應

陞之缺補用以示獎勵其陣亡弁兵著咨部優卹
至惠齡奏探聞恒瑞由雙河彭家岡一路帶兵截
剿前來兩路賊匪諒必歸併一處已與恒瑞等密
訂日期前後夾攻等語是該處南北兩路之賊業
經屯聚一處而惠齡所帶大兵亦可與恒瑞等會
合正可四面兜剿聚而殲擒惠齡恒瑞等務宜倍
加奮勉上緊圍剿斷賊匪分竄之路將首逆姚之

富劉起榮張富國等按名擒獲究出劉之協下落
一併生擒殲淨餘匪以靖地方佇盼捷音

初七日

戊申

觀成英善勒禮善奏言

臣

觀成於十

二月初四日率同協領蘇勒芳阿候補叅將呂

朝龍等酌帶官兵五百名啟程回川十九日行

抵梁山接准

臣

英善知會自本月初十日奪佔

馬鞍山賊卡以後賊匪愈肆衝突

臣

觀成兼程

別進隨於二十二日巳刻行至峩城山地方聞

鎗礮之聲探知賊匪現撲冉家壩營卡

臣

英善

勒禮善率領兵勇與賊接仗

臣

觀成卽親督

弁兵加緊行走前往接應我兵正在攪殺間得

添生力兵丁人人踴躍殲斃賊匪甚多餘匪知

有援兵始行退回巢穴二十三日寅刻又據探

役報稱賊匪復率醜類三四千人赴馬鞍山一

帶衝突臣等一面飛飭縣丞余鉉呂朝恩帶領

義勇八百名馳往馬鞍山協同該處守卡都司

五十六等竭力堵禦並派蘇勒芳阿等帶領滿

漢屯土官兵二百名縣丞楊世鼇等帶領鄉勇

二百名呂朝龍等帶領滿漢屯土官兵三百名

經歷盛世綺等帶領鄉勇二百名分爲兩路接

應以防賊匪抄襲詎該匪等竟三路直撲馬鞍

山營卡五十六等督率義勇首王丕承王案祿
等分頭迎擊正在酣戰適蘇勒芳阿呂朝龍各
率兵勇兩路並進分頭衝殺鎗刀弓箭並舉斃
賊一百五十六名賊匪慌亂奔回奪獲刀矛礮
位烏鎗旗幟甚多生擒賊匪二十六名解送來
營內有李有洞戴文彩柳秀元訊係賊目俱卽
正法此次打仗雲騎尉舍楞額千總廖廷超投

効革職守備陳愷龍文生郭承棫武生余躍先
均各奮勇殺賊受傷陣亡其餘弁兵間有受傷

查明另行咨部臣觀成查看賊匪屯聚之張家

觀茅坪一帶俱係懸崖陡壁路徑險要該匪等

層層紮立木城此時屢次衝突自係賊巢人多

糧少是以捨死下山搶掠臣英善已經飭匠鑄

造大礮但必須各處設卡逐層圍截方可施放

庶賊匪驚懼潰逃之時即可分投剿殺刻下所
設卡隘俱係雇募鄉勇防守而賊匪竄路甚多
尙應添卡防堵現在兵勇不敷剿捕臣觀成所
調陝兵二百名尙未接准陝省咨有起程日期
伏查新疆五屯及松潘等處原尙可抽調官兵
千餘名因係邊防重地未敢輕動現據綽斯甲
土司因五寨各土司告請撥兵赴達協剿亦差

頭目來營具呈以該土司同沐

皇恩情愿派撥土兵二百名助剿

臣

等當卽在其所

請因思各處土司均能恭順向化當此剿賊緊要之時自必人思敵愾是以商同酌調松潘懋功維州等處兵一千二百名以資剿洗奏入

上命軍機大臣傳諭宜綿觀成英善秦承恩柯藩曰
達州賊匪經官兵奪佔馬鞍山後尙敢屢次衝突

今英善等剿賊時適值觀成帶兵到彼會合夾攻
殲賊甚多所辦尙好其奮勇殺賊受傷陣亡之雲
騎尉舍楞額千總廖廷超革職守備陳愷龍文生
郭承械武生余耀先均著各部加一等議卹該處
賊匪屢經官兵剿殺勢已窮蹙自因人多糧少是
以屢次撲卡希圖下山搶掠觀成酌調松潘等處
兵丁一千二百名前往協剿固屬得力但宜綿索

費英阿已經前赴太平達州會剿觀成發摺時自
尙未得信計所帶兵丁共有二千餘名秦承恩柯
藩在光頭山搜捕餘匪後柯藩又可帶兵前往此
時諒已到彼聲勢壯盛務須會同上緊籌辦併力
攻剿

同日

上命軍機大臣傳諭惠齡成德曰軍機大臣審訊已

革署總兵黃瑞據供因張家口係糧運要路在彼
駐劄一節查與從前福寧等奏到圖說尙屬相符
惟所稱沿河地廣兵單會稟請成德添撥兵丁雖
現據黃瑞面呈案據但究係一面之詞又所稱河
面淺窄賊匪係臨時搭橋並非預先搭蓋及賊匪
分作三路偷渡時黃瑞會將大嶺賊匪截殺之處
亦恐係捏詞卸罪未足憑信著將兩次所訊黃瑞

供詞發交成德閱看據實覆奏至惠齡曾在黃柏
山剿辦賊匪於從前賊匪偷渡情形自所深悉並
著秉公據實覆奏再行定擬

初九日庚戌惠齡恒瑞慶成舒亮奏言臣惠齡慶

成前在官潭等處剿殺賊匪後探得竄匪已逃
往興隆集一帶藏匿並據恒瑞知會自二十八
日在彭家岡將賊匪殺敗賊復折向北逃現在

設法抄截等因

臣

惠齡查兩路逆匪現歸一處

黨夥尙多因思時屆歲除賊諒官兵未必進剿

止可苟延度歲自應乘其無備之時分兵掩擊

當卽會同商酌

臣

惠齡與巴克坦布總兵德光

帶領巴圖魯侍衛江鼎等從槐樹岡一路抄襲

臣

慶成與訥音六十七帶領巴圖魯侍衛哲克

等從紅花店一路迎頭截擊均令馬兵在前鎗

兵繼進並以刀矛互相接應當於三十日三更

同時並發正月初一日卯刻臣慶成先至賊屯

山梁察看山岡前後賊人棚帳共有八處正在

炊爨一見官兵卽齊上山岡排列公然抗拒臣

慶成鼓勵各兵向上直撲賊匪愍不畏死捨命

相持臣惠齡已自槐樹岡繞至賊屯對面見我

兵正在鏖戰卽令江鼎祥金保帶領馬兵衝入

賊隊賊匪雖亦分投迎拒因馬軍橫衝直擊力
難抵禦臣慶成帶領兵將馬步並進甘肅把總

陳虎直隸把總張進忠奮勇爭先殺死賊目三
名兵丁趁勢直前無不以一當百賊匪自相擁
擠登時忙亂我兵勇氣百倍兵鋒所到無不洞
胸穿腋餘賊棄其輜重盡向東北一帶奔逃臣

惠齡慶成督率副將觀祥都司岳寧阿帶領官

兵奮力截殺沿途殺死約千餘人適

臣

恒瑞舒

亮同碩雲保阿爾薩朗富成等聽聞東北鎗礮
之聲亦帶兵截殺前來正遇潰匪狂奔而至卽
率馬兵截擊賊匪見兩路官兵圍剿奪路亂竄
我兵隨勢擊殺又斃七八百人時已天晚雨雪
交作官兵隨追數十里直至七方岡地方賊皆
四散遁逸路徑溇滑當卽傳令各兵紮住官兵

竟夜露宿毫不知疲現查潰敗餘匪俱向西北
逃遁臣等一面分派弁兵在附近一帶搜捕卽

日督兵前進探蹤截殺統計此次殺賊實有二
千餘名內有賊目繆世豪楊開奇等二名觀祥
岳寧阿生擒王國珍等一百二十三人奪獲刀
矛五百餘件牛馬帳房衣服糧食無算當提王
國珍等逐一訊問均係習教從逆屢次抗拒官

兵之犯內有彭萬選樊則典劉葵徐學文劉向
從等五名實係與姚之富等同領教匪執旗頭
目當卽凌遲處死餘皆梟示此次將士兵丁雪
夜兜圍人人用命臣謹擇其勞績尤著者開單
恭呈

御覽再據慶成拏交活賊內有楊應邦一名經候補
知府鄭成基細加究訊據供曾聽得劉起榮說

劉之協現在藏匿河南裕州鄧家河居住之張
洪潮家他們屢欲竄入河南往見劉之協均被
官兵截殺不能過去常密使夥匪趙姓扮作貨
郎往來通信我雖未曾見過劉之協張洪潮趙
姓却是認識他現在劉起榮手下等語臣惠齡
自抵軍營亟欲早得首逆下落當卽親提該犯
審訊無異雖係一面之詞但既有此供自應趕

緊密拏若專派弁兵前往稍有聲張轉恐要犯
遠颺所關非細除一面密行知會景安不動聲
色速卽親往偵密查拏並委員將楊應邦一犯
押解河南交景安查辦奏入

上命軍機大臣傳諭惠齡景安曰鍾祥竄匪自分路
敗逃後屢經截殺歸併一處黨夥尙多惠齡等於
歲除進兵分路抄截奪據賊匪屯聚山梁恒瑞等

亦帶兵迎殺併力窮追殺賊二千餘人生擒一百
二十餘人所辦可嘉之至惠齡等自剿賊以來在
王家城梓山連得勝仗大挫賊鋒茲復痛殲賊衆
追奔數十里轉戰一晝夜尤爲奮勉出力且當元
日令節獲此大勝事機順利非特惠齡布置得宜
卽恒瑞慶成舒亮亦因貽悞在前各知愧懼奮勉
出力若能迅速蒞功不但可贖前罪並當酌量施

恩惠齡著賞給白玉如意一柄大小荷包恒瑞慶
成舒亮各賞給鑲玉如意一柄大小荷包以迓春
祺而昭優眷所有保奏出力人員已降旨分別加
恩矣至惠齡等奏稱審訊賊匪楊應邦供出聽得
劉起榮說過劉之協現匿河南裕州鄧家河居住
之張洪潮家已知會景安查拏並將楊應邦解往
河南查訊等語劉之協爲邪教案內要犯與逆匪

勾結通信甚爲可惡今旣向賊匪究出該犯蹤跡
所供自屬確實著傳諭景安如能親往甚善倘實
不能遠離卽派委妥幹員弁不動聲色在裕州密
訪查拏務須迅速擒獲則邪教匪徒可以淨絕根
株所關甚要不可使聞信遠颺又致漏網

上諭內閣曰惠齡奏正月初一日殺賊二千餘名轉
戰數十餘里此次在事出力員弁均屬奮勉應照

所請量加獎擢所有三等侍衛江鼎著賞給騰額
特巴圖魯名號藍翎侍衛塔什蘭著賞給綽克托
巴圖魯名號甘肅副將觀祥著賞給阿克達楚喀
巴圖魯名號健銳營委章京烏勒興阿著賞給喀
屯巴圖魯名號西安防禦札勒杭阿著賞給噶勒
炳阿巴圖魯名號直隸都司岳寧阿著賞給薩勒
杭阿巴圖魯名號都司郭成緒著賞換花翎知州

阿林著賞戴花翎千總劉愷把總張進忠陳虎著
賞戴藍翎二等侍衛丑保著授頭等侍衛二等
侍衛祥金保著授爲二等侍衛藍翎侍衛哲克著
授爲二等侍衛所有此次打仗一晝夜之兵丁俱
著賞一月錢糧以示鼓勵